



23. januar 2015

UPA 2015/126

Inatsisartut suleriaasianni § 36 naapertorlugu apeqquteqaat tunngavigalugu oqallinnissamik imaattumik siunnersuuteqarpunga:

Inatsisartuni partiit tamalaat akornanni ukiuni tulluuttuni inuussutissarsiornermi periusissat pillugit isumaqatigiissusiortoqarsinnaanera pillugu apeqquteqaat tunngavigalugu oqallinnissamut siunnersuut.

(Inatsisartunut ilaasortaqa Sara Olsvig, Inuit Ataqatigiit)

Aningaasarsiornikkut killiffipput toqqissisimanangilaq. Ineriartornermut uuttuutaasinnaasut pingaarutillit tamarmik ajorseriarnernik takutitsipput, aarleqqutigineqarsinnaavorlu nunap aningaasarsiornera ataatsimut isigalugu aammalu suliffissaaleqineq eqqarsaatigalugu suli ajorseriartoqarsinnaasoq, Inatsisartut ataatsimoorussamik siunissaq ungasinnerusoq isigalugu attanneqarsinnaasumik inuussutissarsiornikkut ineriartortitsinissamik isumaqatigiissuteqarsinnaanngippata.

Qularutissaagunangilaq inuussutissarsiornikkut ineriartorneq pillugu, pingaartumillu aatsitassarsiornermut tunngasutigut ukiuni kingullerni naalackersuinikkut aporaanerujussuit, atugassarititaasut pillugit nalornisitsilersimassasoq, ilaatigut akileraaruseruineq, royalty il.il. pillugit. Tamatuma saniatigut nunarsuaq tamakkerlugu aningaasarsiornikkut ajornartorsiornerup kinguneranik nunani tamalaani aningaasaliisartut tunuarsimaarput.

Inatsisartuni tamanit peqataaffigineqartumik isumaqatigiissusiornermi inuussutissarsiutit pingaaruteqarnerit, soorlu aalisarneq, sanaartorneq, aatsitassarsiorneq, nunalerineq takornariartitsinerlu ilanngunneqartariaqarput.

Isumaqatigiissuteqarnerup inuussutissarsiornikkut aningaasarsiornikkullu pitsaanerussamut ineriartorneq aqqutissiuutissavaa, tamatumalu kinguneranik inuussutissarsiutinut tamanut aningaasalersuerusussuseq qaffassassallugu. Pisuussutinik uumasunik uumaatsunillu iluaquteqarnermi nutaaliorneq ineriartortitsinerlu immikkut isiginiarneqassapput.

Oqallinnermi ilaatigut makku aallaaviunissaat kissaatiginarpoq:

- Atugassarititaasut patajaatsut qanoq ittut siunissami atuutsinneqassappat?
- Pisuussutit uumassusillit uumaatsullu qanoq akileraarusersorneqassappat / akitsuusersorneqassappat?
- Suliffeqarfii pisortanit pigineqartut sorliit namminersortunit ingerlanneqalissappat imaluunniit ingerlanneqartariaqarpat?
- Attaveqatigiinnermut tunngasunik aningaasaliiffigineqartariaqartut suussappat?

- Inuussutissarsiutitut nutaanut aningaasaleerusussuseq qanoq ililluta qaffassar-sinnaavarput?

Oqallinnerup qanoq ingerlanera apeqqutaatillugu Inatsisartut ataatsimoorussamik oqaaseqaateqarsinnaapput, Naalakkersuisunut kaammattuillutik isumasioqatigiisitsinermik aaqqissuusseqqullugit, inuussutissarsiortut, aningaasaateqarfiit, aalajangiisartut il.il. sinniisuinik peqataaffigineqartumik, ataatsimoortumik siunnerfiit suussanersut qanorlu iliuusissat ittuussanersut pillugit oqaasertaliisinnaaqqullugit..